

# 瓊州府志卷之六

## 建置志一城池 公署附

瓊州府

瓊州府城即海南衛城也漢置珠崖郡城在東潭都唐貞觀五年析崖之瓊山置瓊州在

白石都築土城其廣三里宋開寶五年始徙今治即漢玳瑁縣地紹興間管帥李諤復築外羅

城元因宋舊阮通志按方輿紀要瓊州府古瓊州城城邑考今府城唐貞觀五年創置宋元因之明洪武二年指揮孫安張榮相繼偕府

縣官用土石增築自西北至東南隅增廣六百丈高二丈五尺為門三東曰朝陽南曰

靖南西曰順化各建敵樓城北無門亦建樓曰望海南臨大溪每有漲溢之患乃築

長堤以為捍禦引溪為濠自東城下達抱淪村七年復擴城北循東至南長三百四十

四丈高闊如舊仍改東門曰永泰西隅增建角樓十一年指揮蔡玉復廣北面自西至

東四百餘丈通計周圍一千二百五十三丈高二丈七尺廣二丈八尺雉堞一千八百

四十有三窩舖共九十有七濠塹周二千二百八十七丈深三丈二尺闊四丈八尺十

七年指揮桑昭又自西門外增築土城三百八丈於西南北亦啓三門上建敵樓謂之

子城化九年副使涂棻改題各門東曰體仁西曰歸義南曰定海十三年僉事陳昭

堅築土城又於大城環增欄馬牆正德初繼修黃通志嘉靖間知府李慎易子城以石旋

圮參議曹天佑知縣曾仕隆邑人參政鄭廷鵠復甃以石周圍三百十二丈高一丈四

尺有奇比舊堞闊一丈二尺上殺三之一雉堞五百三十二門仍舊萬歷二十五年颶

風城毀知府李多見復修之崇禎十四年知府蔣一鴻創建東門外月城寬八丈高一

丈四尺比舊堞闊八尺雉四十有二關門一南門外月城周四丈高闊如之雉堞三

十國朝順治十二年學道林嗣環知府朱之光推官何澄知縣孟信協力捐修增高

雉堞一尺厚五寸旋圮康熙六年巡道馬逢臬知府張恩斌知縣王好仁修葺復壞八

年知府牛天宿知縣金光房再修十一年颶風西門至東門坍塌五十三丈雉堞四百

零二學道王廷伊知府牛天宿同知劉永清知縣劉源清捐修二十四年颶風城傾六

十餘丈雉堞一百二十并各城樓子城副使程憲總兵劉成龍知府佟湘年同知王元

臣副將李尙臬知縣朱玘捐俸分修三十一年知府張萬言捐建南樓三十三年建東

樓四十年巡道焦映漢重修雍正七年颶風損壞乾隆三年署縣事崖州知州張埕詳請修復四年六年疊遭颶風傾圮八年知縣楊宗秉修復三十七年知府蕭應植率屬修葺嘉慶十年知縣鄭榕捐修二十三年知縣李景沆同闔屬州縣捐修道光二十年知縣金樹本捐廉重修

海口所城在郡北十里明洪武二十七年都指揮花茂奏准防倭二十八年安陸侯吳傑鳩工創築周五百五十五丈高一丈七尺廣一丈五尺雉堞六百五十三窩舖十九門四各建敵樓東北臨海築砌石岸九十丈復自東南延西北浚濠凡四百六十五丈廣一丈五尺深五尺永樂十六年指揮牛銘復增砌石成化十三年僉事陳昭增築欄馬牆

國朝康熙六年學道馬逢臬知府張恩斌知縣王好仁加修十年學道王廷伊知府牛天宿同知劉永清再修十一年颶風坍塌益多王廷伊等復修之二十四年颶風傾二百三十九丈雉堞一百八十六城樓四副使程憲等捐修雍正七年颶風復損各州縣合修乾隆四年六年疊遭颶風城樓坍塌知縣楊宗秉修復三十七年知府蕭應植率屬

瓊州府志

卷六

建置 城池

一

瓊州海口海南書局印行

補修乾隆五十六年咨准部覆動項修葺嘉慶十三年知縣言尙煒捐修道光八年知縣蘇榮捐修

瓊山縣附郭

萬壽宮乾隆四年巡道劉庶總兵武進陞知府李毓元瓊山縣知縣杜兆觀等始捐建於城西南隅中爲

龍亭一座外朝房十間午門三間官廳二間十一年巡道謝樞總兵黃有才知府于霽瓊山知縣楊宗秉等合捐增建內朝房十間

分巡雷瓊兵備道署在府治之右元設海北海南分司明洪武二年改爲州署三年陞州爲府移府治於東以州署仍爲海南道署成化二十三年復移道於東而以舊署還府 國朝因舊址頽圯改參將署爲分巡學道署卽今公署康熙十一年傾圮分巡學道王廷伊興修乾隆十四年巡道黃錚重修大門儀門六房添建花廳立牌樓二十二年巡道張介祺重修二堂并補葺署中廡舍三十五年大風牌樓傾巡道王錦重修嘉慶二十二年護道史祐瓊山縣知縣李景沆修建內寢及頭門客廳道光十一年護道

金蘭原重修

瓊州府署在道署左舊爲元海北海南道署歷經更移自明成化二十三年知府張英復遷舊址卽今公署宏治六年知府張宣繼於堂東置經歷司西置照磨所廣盈儀從二庫及六房署後左置樓正德六年知府王子成添建官舍隆慶二年大堂圯知府史朝宜重建五楹後堂如之左爲燕思堂列吏舍儀門又左爲土地祠右爲虛受堂 國朝康熙十一年大風後衙穿堂及儀門全圯大堂及六房半隳知府牛天宿次第修建雍正三年知府岳綸修葺大堂乾隆二十一年署將傾圯知府左興率屬捐修道光八年知府普祥捐修二三堂及庫房吏舍十一年署知府王玉璋修葺十四年知府富爾崇阿捐修

海防撫黎同知署在海口所城內卽都司舊署同知署原在府治東乾隆三年移駐崖州以舊署改爲府學明倫堂嘉慶二十年奏准令同知還駐郡城道光十三年移駐海口所同知裴驥請以崖州舊署變價改建新署於海口時水師都司缺裁因就舊署基址爲之

教授署在府學西乾隆三十六年建道光二年教授張衍基同紳士捐修

訓導署在府學東乾隆三十六年建道光二年訓導王紹曾同紳士釀金添建旁屋一間廡舍俱修葺十六年訓導謝承宣捐修

雷瓊道庫大使署舊以府倉大使兼理後府倉歸併首縣倉大使裁專設庫大使署歲久坍塌乾隆二十一年署知府李璜詳建署於城內靖南街

提督學政行署瓊郡隔越重洋向無公署康熙二十五年副使程憲知府佟湘年於南門直街建講約亭三十三年知府張萬言卽亭爲試院事竣仍講約雍正十年知府宗思聖率闔屬吏民捐建試院於府署左乾隆三十五年改爲府學宮卽以府學故址爲試院在城內東南隅道光六年闔郡紳士釀金購石改砌東西文場坐號

按明初至中葉學使按臨雷州檄瓊士北渡赴試萬歷七年准郡人尙書王宏誨疏以海南道兼提學事 國初仍之康熙十五年始以廣東提學道巡試雍正九年分設提學二瓊隸肇高督學考校乾隆十六年督學復歸於一惟渡海維艱故歲科兩

考一時舉行志

瓊州鎮總兵署在西門內即分司舊署改建

中軍兼管左營遊擊署在城內府治西順治四年建乾隆四十二年五十七年兩次詳修

左營守備署在遊擊署西順治四年建乾隆五十八年詳修

右營都司署在南城內順治四年建乾隆四十二年五十七年詳修今漸傾圮

右營守備署在城內靖南街順治四年建乾隆四十九年六十年詳修

左營軍裝庫在府城北順治四年建嘉慶二十年詳准修理

左營火藥局在府城北順治四年建乾隆五十七年嘉慶二十二年詳修

右營軍裝庫在城南順治四年建乾隆四十五年嘉慶二十年詳修

右營火藥局在城南順治四年建乾隆五十七年嘉慶二十一年詳修

海口營參將署在海口所城西門內即副將舊署康熙二十三年建

海口營中軍守備署在海口所城內劉衙巷康熙二十三年建

海口營軍裝火藥局在海口所南門內康熙二十三年建

瓊山縣署在府署西南隅唐建縣署在郡城外西隅宋元因之明洪武二十八年徙瓊臺

驛於城外始用驛基爲今署永樂九年知縣歐陽旭創建天順四年燬於倭寇六年知

縣陳通復建成化三年知縣梁昕相繼完繕並買門外廢址增建坊亭宏治九年知縣

曾珽重修堂廡吏舍嘉靖二十四年知縣林應采再修中爲大堂東西爲庫萬歷三十

三年地震傾圮知縣龍時雨修復 國朝康熙十一年颶風悉圮知縣劉源清重修乾

隆二年二堂損壞知縣李同修七年知縣江日暄修六房吏舍十年知縣楊宗秉重修

道光九年知縣蘇榮捐修二堂十四年知縣張德尊捐修二堂旁屋及左右吏舍

縣丞署在海口所城南門內

教諭署在縣學大成門東乾隆三十五年建

訓導署在縣學大成門西乾隆三十五年建道光十一年訓導吳家樹同紳士捐修

典吏署在縣儀門內今遷縣後街

水尾司巡檢署在水尾汛

僧綱司在城北天寧寺

道紀司在城北三清觀今玉皇廟

澄邁縣

澄邁縣古無城池明正統十二年按察使郭智典史李黎生創築土城周僅百丈成化初主簿楊正稍拓之廣二里許宏治元年知縣韋裘拓址甃石周五百八十丈高一丈三尺闢三門上各建樓東曰迎恩南曰歸仁西曰通潮北無門建樓曰望海因河為池正德七年知縣李茂重修增高雉堞一尺嘉靖三十一年修城浚隍復設望海樓萬歷二十年署縣事陳來旬徙南門於縣署前名曰嚮明崇禎十三年知縣解學臯建東西南三門子城 國朝順治十五年知縣吳翹重修增高雉堞一尺康熙四十五年南城樓及城門圯知縣高魁標重修雍正四年知縣鹿耿從邑人請改嚮明門為文明門工未竣知縣趙起龍續成之七年知縣田文燾捐修嘉慶十五年海寇頻擾知縣蓋運長修

縣署隋大業中始建唐宋元因之元末燬於寇明洪武三年知縣劉時敏循舊址建復門堂廡宇及吏舍畧具景泰間縣丞魏春建設倉廩以備儲蓄成化元年海寇焚燬官署蕩然知縣江汜復修未備二十一年知縣韋裘增廣之正德元年典史李榮添建幕廳五年知縣盧暉重建儀門吏舍萬歷九年知縣喻效龍重修大堂五間東西二庫二堂

後為內宅東西次為六房東為幕廳儀門三間前為土地祠迎賓館西為獄煥然改觀三十四年地震盡圯四十一年知縣鄭拱璧修葺如舊崇禎末壞於颶 國朝順治十六年知縣吳翹修復康熙九年知縣丁斗柄始遷建於分司舊址三十九年知縣高魁標捐建三堂五楹及內宅房舍三間四十年又捐修東西吏舍八間在舊倉東四十二年捐修大堂幕廳及倉廩後堂垣墻規制完備嘉慶十二年知縣蓋運長修二堂三堂及穿堂箭亭二十年大堂頽壞知縣李金藻捐修道光十三年署知縣龔耿光重修三堂十五年知縣高凌漢捐修增建旁舍堂西為虛受齋凡六間

教諭訓導署一在縣學東一在縣學西俱道光十五年建  
典史署在縣署左康熙四年燬於火十一年建在縣署大門外東偏道光十一年典史李滋修十五年典史胡承基修大門

澄邁司巡檢署原在城西六十里那托都今移城南七十里金江打鐵市  
城守署在城內學校之西

定安縣

定安縣設於元至正間初無城郭明成化二年都御史韓雍始議築正德五年知府王子成歐陽傅謝廷瑞相繼鳩工砌石周五百九十三丈高一丈四尺廣丈有六尺雉堞一千一百九十二闢東西南三門上各建樓城北臨江餘三面共浚濠三百六十餘丈嘉靖二十四年副使胡永成知縣徐希朱創開北門後以形勢不利尋復塞 國朝康熙二十九年知縣董興祚復開北門捐修城樓乾隆五十一年遭颶風西南城圯知縣楊文鎮捐修嘉慶十年知縣李仁峻捐修西北兩門及城牆二十三年知縣周祚熙倡率士民修砌

縣署明洪武二年知縣吳至善創建初甚隘永樂間知縣吳定實拓其基宣德元年燬於黎賊二年知縣白尙德修復成化間知縣勾永昇傅霖再修歲久漸圯 國朝順治十六年知縣王昌嗣重建大堂康熙十一年知縣楊天授修復二堂三堂二十年知縣韓成秀添建內宅二十四年圯於大風知縣張文豹捐俸重修三十六年知縣余巽言修造乾隆二十九年知縣倪邦良修葺四十九年知縣楊文鎮捐俸修復建亞相解慍各軒添內室三間道光十四年知縣譚光第重修

教諭訓導署俱在縣學門內東西各一

典史署在縣署右明隆慶間典史楊從吉建 國朝康熙二十九年典史趙之灝重建

太平司巡檢署舊在嶺門市後圯移駐南閩市廟後

城守署在城內

文昌縣

文昌縣元至順間遷今治初未建城明隆慶六年副使陳復升知縣顧乃猷督建以石周三百五十丈廣一丈高一丈五尺雉堞七百闢南北二門南曰南薰北曰拱北又闢小門門各建樓設舖舍十西南瀕溪東北就田爲濠萬歷二十年縣丞蔣梯增高雉堞廣馬道各三尺增舖舍十八崇禎五年知縣魏懋績塞南門開坤門八年復舊改南門曰圖南十二年知縣周廷鳳增築月城 國朝順治十一年重修旋圯康熙元年秋大水城圯七十年知縣鄧生柏城守拓福祿修推官姚士升督成之六年知縣沈黼重修五十二年知縣馬日炳捐修南北城樓五十七年又捐修西北各城六十年復闢東門雍正四年知縣冷岐暉修葺嘉慶十五年知縣鄒紹觀重修

舖前土城明嘉靖間知府張子宏因寇設防初建土城隆慶間爲澳賊所據賊平設參將守之縣尉管汝賓千戶周宗彝築以石周一百八十五丈旋圯參將黎國耀遷建於澳賊李茂舊穴後罷守官城久亦隳今設巡檢駐守

清瀾所城舊在邑之青藍都明洪武間千戶陳良督造萬歷間土賊林鳳攻城陷之千戶朱炫知縣羅鵬徙建南砦都陳家村壘石爲垣周三百五十丈闊一丈高丈有八尺雉堞九百 國朝康熙元年秋大水圯百餘丈七年守禦所千總倪灝補葺今設巡檢駐此

萬壽官在北門嘉慶二十四年知縣觀瑞捐建

文昌縣署元至順間始遷今治創構堂宇明洪武二年知縣周觀葺之永樂九年知縣易信改爲東向後知縣田容宋經翁暉相繼繕修宏治二年知縣鄭宏營建後堂嘉靖二十一年知縣謝時濟營建大堂隆慶六年燬於倭寇縣丞金越重建萬歷六年知縣羅鄂增設齋舍天啓丙寅知縣吳祐重修 國朝初知縣鄧生柏同丞尉吳鼎王都重葺之康熙七年知縣沈彰補其未竟旋被颶風所毀十九年知縣何斌修復三十六年知

縣孔興祥重修五十二年知縣馬日炳捐修大門及左右吏舍雍正十三年知縣梁繼世修乾隆三十七年知縣余發林修穿堂頭門五十七年知縣彭錫璜增修嘉慶十二年署縣事孫海觀修道光十二年署縣事李九如修

教諭訓導署俱在縣學內嘉慶九年改建於學宮左

典史署在縣署儀門左明萬歷間典史王春福捐修 國朝康熙二十三年典史舒際霖修五十四年典史李士萼捐修增拓嘉慶九年典史馬愷修

舖前司巡檢署在縣北邁犢村嘉慶七年重修

青藍司巡檢署在縣東北清瀾港青藍都

城守署在南門內嘉慶二十三年把總鍾振朝修

會同縣

會同縣本樂會縣西境地元至元二十八年割置會同縣於永安都之烏石埔皇慶元年

燬於土酋乃徙治端山明因之初未有城也嘉靖二十九年

縣志作元年誤

總督歐陽必進命

知縣築砌土城隆慶六年毀於賊副使陳復升知縣唐仲科壘以磚石周三百八十丈

有奇高丈五尺廣一丈關門四門各建樓萬歷十三年霪雨城圯知縣徐應麟修復增置窩舖崇禎十三年知縣駱用發加修東西二門各建甕城尋塞其南 國朝康熙三年知縣黃信讓捐修七年風雨倒壞知縣曹之秀訓導梁英裘再修

萬壽宮在東關外本應臺書院舊址明未改爲同文書院久廢今即其地改建

縣署元皇慶初徙治端山嘉會都明洪武二年知縣李時中修四年署縣事李森增修宣德元年燬於寇知縣蔣誠重建成化至崇禎間知縣陳釗陳策劉源曾廷梅林恕陳儒金之瀾許之會王廷麟相繼繕修 國朝康熙十一年知縣曹之秀增修嘉慶十五年十八年知縣江秋修葺二十年署知縣段長基捐修二堂三堂二十四年知縣陳述芹修道光十一年知縣錢光選修

教諭署在縣學明倫堂後

訓導署在縣學明倫堂左

典史署在縣署西

城守署在城內東門街

樂會縣

樂會縣元大德四年因寇亂遷縣於河南之陰陽山即今治初未有城也明隆慶六年副使陳復升知縣張綱始運石建築周三百七十二丈關南北二門萬歷五年知縣彭大化鑿濠七年典史袁光英復浚之崇禎二十三年知縣王懷仁陳蕃李時興相繼增修全城並開縣前正南門後以不利尋塞國朝康熙二十二年知縣張結綠通志作張紹綠重開五十五年知縣謝銜增建子城及南門樓雍正元年知縣趙光緒重修

縣署自唐迄元大德凡四遷始爲今治初皆草創明洪武二年知縣王思恭創建堂宇門廡吏舍倉庫規模始具永樂至嘉靖間知縣王養莫卿楊球魯彭鄭雲鵬相繼捐修崇禎七年知縣劉謙光修 國朝乾隆五十六年知縣曾大任重建嘉慶七年知縣解鯉捐修十四年知縣李疇重修道光七年代理知縣沈邦本修十一年十三年署知縣施毓周唐澍澤相繼捐修十五年知縣呂華賓修

教諭署在縣學內康熙十一年重建嘉慶十二年教諭鄧培修

訓導署在縣署西距學宮稍遠嘉慶十二年議遷安樂書院舊址不果



典史署在縣堂西道光十二年典史相君才修

城守署在縣學東明萬歷間就安樂書院舊址建久圯 國朝道光二年千總周明清捐資改建於城隍廟西

### 臨高縣

臨高縣宋紹興壬子遷縣於莫村即今治因河為池歷元三百餘年並未有城明正統八年

按察使郭智知縣徐瑄始壘石為垣周六百丈高一丈設東西南三門宏治十六年知

縣林彥修重修正德間知縣周讓梁高相繼增壘高至二丈三尺雉堞八百五十有八

凡三門皆因河為池黃氏通志云池長二百一十丈七尺闊二丈深四尺城北依山正德末秋水暴至知縣吳大裕創

開北門嘉靖二十八年知縣陸湯臣重建各門樓舖舍通判楊表增築東西門月城

扁曰東安西阜及東西二關隆慶二年知縣李棟又增高雉堞廣馬路各一尺五年通判阮琳

浚濠萬歷八年縣丞黃思懷移北門市於西巷 國朝順治十七年河漲潰城東南知

縣蔡嘉正修復康熙十一年颶風壞東南城堞知縣陳垂修復二十五年東門月城圯

知縣李繩祖修復三十二年知縣史流芳重修并新四門四十二年水漲東門圯知縣

樊庶修復并樹堤閘以防水患兼修西南門雉堞四十四年移南門於學宮前顏曰文明雍正七年知縣魯遐齡捐修各城樓乾隆三十五年知縣王人驥增高南門樓三十八年署知縣譚崇基倡修坍塌城垣二十七丈嘉慶八年題准動項重修二十一年知縣鄧寅春續修

縣署宋紹興間徙縣治於此始創建元大德中達魯花赤黑漢知縣林儒繕修元末燬於

寇明洪武二年知縣王續縣志作王績復建永樂三年知縣朱原律縣丞陸彥升重構堂廡

倉庫儀門吏舍宣德三年知縣魏達增葺成化宏治正德間知縣甘素鄭鍾梁高相繼

修嘉靖間知縣黃必大陸湯臣重建大門東西幕廳萬歷四十一年知縣張宏毅修崇

禎間燬於黎賊 國朝順治十二年始構茅堂於舊址十八年知縣蔡嘉正重建後堂

廡宇儀門康熙九年知縣陳垂增修三十二年知縣史流芳修建堂宇及六房四十二

年知縣樊庶捐建大堂穿堂倉庫嘉慶十三年知縣丁堂捐修二十一年知縣鄧寅春

修道光三年知縣謝濟韶修大堂二三堂及吏舍十一年知縣徐汝述復修

教諭訓導署在縣學左右乾隆六十年邑人以署基增廣學宮教諭林雲鶴訓導顏鑄重

建

典史署在縣署之左乾隆三十年典史湯德在建道光十三年典史呂基堃重修  
和舍司巡檢署在城南九十里舊為博舖司巡檢乾隆元年改為和舍司移駐和舍市動  
項建造衙署三十年典史湯德在修道光十一年巡檢宋志祖修  
城守署在城西

儋州

儋州漢儋耳郡城在舊宜倫縣高麻都浦灘舖樓船將軍楊僕所築僅二百六十步高一  
丈四尺唐初置州始徙高坡即今治去浦灘舖舊址三十里宋元因之明洪武六年知州田章拓址  
築基指揮周旺運石鳩工周四百七十二丈廣一丈八尺高二丈五尺雉堞八百一十  
有四窩舖二十有七關門四東曰德化南曰柔遠西曰鎮海北曰武定上各建敵樓外築月城沿城浚濠周四  
百七十七丈闊五丈深八尺後守帥徐真徐春等增飾門垣樓舖壕塹弔橋隆慶間知  
州陳儻創建四角樓今廢 國朝康熙二十四年霪雨傾圮二十七年知州沈一成捐  
修乾隆六年題准動項重修道光七年知州汪阜捐修東南北三門月城及甕城門補

瓊州府志

卷六

建置 城池

十

瓊州海口海南書局印行

葺城垣雉堞

萬壽宮在州城內道光元年知州錢維清捐建十五年圯於風署知州譚光第松壽相繼重修  
州署唐初置儋州遷於高坡即今州治宋元雖改郡城州改軍皆仍舊署明洪武二年知  
州田章修建二十九年知州王彥銘建堂廡庫獄吏舍儀門外設土地祠迎賓館規模  
畢具後知州林珙羅傑陳袞毛鶴蕭宏魯潘時宜吳泮陳儻潘楠曾邦泰歷次踵修  
國朝康熙二十九年知州沈一成修乾隆六年知州姚建廷題准動項修葺嘉慶十三  
年知州曹世華修道光四年知州朱榮修

學正訓導署俱在學宮左右

吏目署在州署東康熙二十八年吏目周一士重修

薄沙司巡檢署在城西南八十里舊為安海司巡檢署知縣葉世華建知州羅傑重修

儋州營遊擊署在州城內東門大街順治八年建乾隆四十二年嘉慶四年俱重修

儋州營守備署在州城內西門大街順治八年建乾隆三十六年重修

昌化縣

昌化縣隋大業間置縣於昌江洲唐宋元因之明洪武二十四年指揮桑昭奏請築城次年委千戶俞凱百戶曾安庀磚石壘築未竟永樂九年倭寇擾亂指揮徐茂重築竣事周五百八十四丈高一丈八尺廣丈有五尺雉堞五百五十有五窩舖十八關門三皆建樓東日拱辰南日寧和西日鎮海北惟建樓曰寧武是歲復委千戶管成浚隍其地多石管以火燬鑿之廣丈有五尺深五尺嗣城漸傾頽崇禎二年知縣張三光修葺國朝順治十一年城圯知縣汪天敏陸觀光嚴于屏相繼修復康熙十一年雉堞樓舖圯於颶知縣高日且重修三十年復壞於風知縣璩之璩典史陳漢修復道光十六年代理知縣烏應昌捐修

縣署隋置在今縣東南十五里舊縣村宋移今縣南十里昌江二水洲中明屢遭水害正統八年知縣周振始遷治今縣即千戶所城廨宇粗具歲久漸圯崇禎四年知縣張三光葺之八年知縣賀登瀛建穿堂國朝順治十四年署知縣陸觀光重構內室及大堂左右吏舍儀門土地祠康熙十一年颶風圯知縣嚴于屏修復三十年又圯於風知縣璩之璩重修

教諭署在縣學內明洪武二十二年建國朝康熙二十三年修典史署在縣堂左

城守署在城中順治十四年建

萬州

萬州宋大觀間徙今治初築土城紹定間砌以磚廣袤不百丈南關一門元至正三年攝州事鄭寬拓西北隅至南隅加石固之周三百三十二丈高一丈八尺關東西南三門明洪武七年千戶劉才請展拓周四百三十六丈高一丈廣丈有五尺雉堞六百六十窩舖十有二關門四東日朝陽南日鎮南西日德化北日拱辰各建敵樓外浚池周四百九十七丈闊三丈五尺深七尺成化七年指揮李泰添築各門月城城樓嘉靖六年指揮徐爵重浚池各建弔橋崇禎十五年知州曾光祖修復月城及城樓國朝嘉慶十四年知州吳晉勳捐修東西南城門及窩舖

南山所城明洪武甲戌都指揮花茂請置所於南山港西周樹木柵爲固永樂間署所事百戶趙昱請移駐十六年指揮張恕督工改建於嶺黎鄉馬鞍山之北登以磚石後爲

陵水縣治

州署自唐置萬安州迄宋大觀凡四遷始為今治時堂宇廡舍倉庫禁獄規制粗具元泰定元年知軍楊漢傑拓址增修後為寇毀知軍楊觀再建復燬於寇明洪武二年改為萬州州同烏肅知州周孟冬復建成化十年知州梁桓重修後知州余忠趙允宗章井相繼修隆慶四年知州竺鳳翔修萬歷二年知州李中孚增置東西廊屋及倉廩崇禎十年知州張權修十五年知州曾光祖修 國朝康熙三年知州朱鼎鏞修十七年知州李炎修六房吏舍乾隆三十五年知州王煇章修三堂穿堂嘉慶四年署知州曹世華修十五年署知州劉承龍修 學止署在學宮左 訓導署在學宮右俱明崇禎二年建 龍滾司巡檢署乾隆三年詳准動項建於分界塘後圯乃遷於蓮塘採訪冊作和樂坡 吏目署舊在州治大門內後遷州治東乾隆十九年遷於州治西廡署朽壞嘉慶二十一年吏目嚴紹陵重修

瓊州府志 卷六

建置 城池

十二

瓊州海口海南書局印行

萬州營遊擊署在州治西大街原為萬南守禦千戶所 國朝初改為分防遊擊署雍正五年重建乾隆三十八年遊擊陳儻修

萬州營守備署在州治北大街乾隆三十年守備梁有鳳重修

萬州營軍裝火藥局在守備署西雍正五年建乾隆三十八年改建

陵水縣

陵水縣明正統元年知府陳瑩請遷縣於南山所千戶城即指揮張恕所建周三百四十四丈高丈有八尺廣丈三尺雉堞三百九十九舖八間門四上各建樓濠池周四百九十七丈廣二丈五尺深一丈成化間指揮舒翼千戶王玉復增高城垣尺許塞西門 國朝康熙十三年縣知高首標修葺之

縣署自明正統間遷縣於萬州之南山所城初創廡宇於城東隅成化二年副使唐彬遷建城北嘉靖二十四年燬知縣莫汝俊遷建今縣治

國朝康熙十二年知縣高首標補建吏舍乾隆五十一年知縣張允熹修二堂並吏舍五十七年知縣瞿雲魁修大門儀門及甬道道光十二年署知縣朱坤重修頭二門及二堂前

後垣

教諭署舊在縣學右道光八年改建於學宮左十二年教諭黃培芳同邑人捐修  
典史署在縣署右

城守署在城南門內節孝祠舊址向未有署道光十二年城守梁玉珍捐建十五年城守  
黃顯國復捐修

崖州

崖州宋以前皆土城慶元戊午始甃磚創雉堞紹定六年拓其址自東門起至海南道止

周二縣志一百四十二丈高丈有六尺關東南西三門元統元年判官李秘創建譙樓

明洪武九年知州劉斌重甃以石十七年儋州千戶李遷復請展拓自海南道起至西

門止周五百十三丈五尺高二丈厚九尺十八年千戶李興復加磚石仍設門三各建

敵樓計雉堞一千一十有七窩舖二十城外浚濠周五百五十七丈深一丈五尺已卯

千戶周崇禮添築月城正統元年千戶陳政洪瑜建弔橋成化二十四年千戶王棗

州志築馬牆崇禎十四年知州瞿罕重修增高三尺 國朝順治十八年知州梅欽重

建東城樓康熙十二年知州張擢士遊擊張德遠捐修西南兩城樓并重浚濠塹乾隆  
四年知州張埕詳允動項修葺改東西月城門皆東西向道光十二年知府王玉璋知  
州秦鏞捐修

朗勇城在州城東北八里為黎賊出沒要害之區明正德十四年知州陳堯恩就高阜處  
建城甃以磚石高八尺厚四尺周二百四十餘丈關門三後以黎平罷戍城猶屹然

樂安新城在州城北一百五十里明萬歷四十四年勦抱由羅活二峒叛黎繼議善後題  
請築堡屯兵戍守知州張宿以抱由峒前瑞芝山為樂安德霞抱牒之衝地名爛紅溝

建立磚城周四百丈高一丈二尺關門三南曰順昌東曰綏安西曰鎮安參將何斌臣又添南靖遠樓北

鎮武樓南門月城小樓一敵樓四 國朝乾隆十七年重修

州署自唐改振州治寧遠縣宋元因之廢署相仍明洪武二年改崖州永樂九年知州徐  
子玉正統二年知州蔣夔相繼繕修景泰七年知州王鐸拓基修建成化九年知州徐  
琦十四年判官賴宣正德二年知州何岡各踵修之歲久傾圮

國朝乾隆二十四年知州王玠修復道光十三年署知州朱坤重修

學正署在學宮內

吏目署在州署右道光十四年吏目王立德修

永寧司巡檢署在州北籐橋汛舊在三亞街為通遠司乾隆三年移駐籐橋改為永寧司始動項建署於此

樂安巡檢司署在樂安城內

崖州協副將署在州署西北即海防撫黎同知舊署明正德二年原設遊擊在州城中街 國朝雍正十一年改為水師參將即以遊擊署改參將署嘉慶二十五年移建於海防撫黎同知署舊址道光十二年改參將為水陸副將署仍舊

崖州協中軍都司署在州城內舊在文昌縣舖前汛嘉慶十六年改為海口協標中軍都司移駐海口建衛署道光十三年又改為崖州協標都司復移建今署

水師守備署在州城內西門街

協標軍裝火藥局在州城內明正德二年創建

感恩縣

感恩縣漢元封時建城於九龍山明正統間自九龍山遷中和鄉即今治初築土城萬歷十年知縣秦中權遷大雅坡二十五年知縣朱景和復遷還中和鄉舊址築城周三百九十四丈廣一丈高丈二尺有奇雉堞七百五十窩舖二關門三南曰平政東曰賓曦西曰延照池周其城歲久垣堞圯 國朝康熙四十三年知縣姜焯修復

縣署隋建歷唐宋元因之明洪武二年知縣黃忠信創置廨宇縣丞楊幹佐之宏治間燬於賊正德十二年知縣龐麟重修 國朝康熙三十七年知縣姜焯捐造堂宇易以瓦蓋年久傾圮乾隆三十一年詳准建造知縣楊侃董其成

教諭署在縣署東

典史署在縣署西

城守署在城西門內